

## **PANDUAN KEPADA PELANCONG/ WARGANEGARA MALAYSIA UNTUK MEMBAWA UBAT-UBATAN DARI LUAR NEGARA KE MALAYSIA**

Akta Racun 1952, Akta Dadah Berbahaya 1952, Akta Jualan Dadah 1952 dan Peraturan-Peraturan Kawalan Dadah dan Kosmetik 1984 adalah Akta dan Peraturan yang mengawal pengimportan produk farmaseutikal termasuk vitamin dan suplemen kesihatan serta kosmetik ke Malaysia.

Hanya produk farmaseutikal termasuk vitamin dan suplemen kesihatan yang berdaftar dengan Pihak Berkuasa Kawalan Dadah, Kementerian Kesihatan Malaysia (KKM) dan kosmetik bernerotifikasi dengan KKM dibenarkan untuk diimport/ di bawa masuk dan pengimportan perlu dilakukan oleh pengimport yang mempunyai lesen atau pemegang notifikasi. Maklumat status pendaftaran produk atau notifikasi kosmetik di Malaysia boleh disemak di bawah carian maklumat produk pada laman web <http://www.npra.gov.my>.

Sebarang pengimportan produk tidak berdaftar atau kosmetik tidak bernerotifikasi / tanpa lesen import atau bukan oleh pemegang notifikasi adalah melanggar peruntukan undang-undang di Malaysia dan jika disabitkan dengan kesalahan boleh dihukum dengan denda tidak melebihi RM 25,000 atau dipenjarakan tidak melebihi tiga (3) tahun atau kedua-duanya sekali.

### **Membawa Ubat ke Malaysia untuk Kegunaan Peribadi**

Pelancong atau mana-mana individu yang pulang dari luar negara boleh membawa ubat-ubatan untuk kegunaan peribadi berdasarkan keperluan Akta dan Peraturan yang dinyatakan di atas. Individu yang tiba di Malaysia dibenarkan untuk membawa ubat-ubatan sebagai sebahagian daripada bagasinya untuk kegunaan dirinya atau ahli keluarga yang tiba bersama. Akta dan Peraturan yang berkaitan adalah:

- i) Seksyen 25 Akta Dadah Berbahaya 1952
- ii) Seksyen 8(2) Akta Racun 1952
- iii) Peraturan 4(2)(a) Peraturan-Peraturan Racun (Bahan Psikotropik) 1989
- iv) Peraturan 7(3) Peraturan-Peraturan Kawalan Dadah dan Kosmetik 1984
- v) Peraturan 18A(1) Peraturan-Peraturan Kawalan Dadah dan Kosmetik 1984

Keperluan Akta dan Peraturan yang berkaitan adalah:

1. Ubat-ubatan termasuk vitamin dan suplemen kesihatan yang dibawa masuk ke Malaysia hanya untuk penggunaan peribadi anda sendiri atau salah seorang ahli keluarga anda dengan kuantiti yang munasabah **tidak melebihi satu (1) bulan penggunaan oleh seorang sahaja**. Jumlah kuantiti yang dibenarkan bagi satu (1) bulan akan ditentukan mengikut label dos produk yang dibawa masuk.
2. Ubat-ubatan preskripsi yang mengandungi dadah berbahaya seperti ganja atau narkotik yang boleh disalahguna atau menyebabkan kebergantungan (*dependence*) perlu diisytiharkan semasa ketibaan di pintu masuk sempadan Malaysia.

Senarai dadah berbahaya di Malaysia boleh dirujuk di bawah Jadual Pertama Akta Dadah Berbahaya 1952 di laman web <https://www.pharmacy.gov.my/v2/en/documents/dangerous-drugs-act-1952-andregulations.html>

3. Untuk ubat-ubatan preskripsi yang dikawal di bawah Akta Dadah Berbahaya 1952 dan Peraturan-Peraturan Racun (Bahan Psikotropik) 1989, preskripsi yang sah atau surat dari doktor yang merawat di luar Negara perlu dibawa bersama semasa tiba di Malaysia. Preskripsi mestilah di dalam bahasa Inggeris, jika dalam bahasa lain perlu disertai dengan terjemahan. Preskripsi tersebut perlu dilengkapi dengan maklumat nama ubat dan dos yang diperlukan berserta dengan kuantiti yang dibawa.

Senarai bahan psikotropik di Malaysia boleh dirujuk di bawah Jadual Ketiga Akta Racun 1952 di laman web <https://www.pharmacy.gov.my/v2/en/documents/poisons-act1952-and-regulations.htm>

Peraturan mudah di bawah adalah sebagai panduan bagi melancarkan proses saringan kemasukan / ketibaan pelancong yang membawa ubat-ubatan atau kosmetik ke Malaysia:

1. Bagi ubat-ubatan preskripsi yang dikawal di bawah Akta Racun 1952, preskripsi yang sah atau surat dari doktor yang merawat di luar negara boleh ditunjukkan kepada pegawai kastam /pegawai penguatkuasa farmasi (jika diminta) untuk melancarkan proses pelepasan semasa ketibaan. Preskripsi yang sah perlu di dalam bahasa Inggeris, jika dalam bahasa lain perlu disertai dengan terjemahan. Preskripsi harus mempunyai nama ubat dan dos yang diperlukan berserta kuantiti yang dibawa.

Senarai ubat terkawal di Malaysia boleh dirujuk di bawah Jadual Pertama Akta Racun 1952 di laman web <https://www.pharmacy.gov.my/v2/en/documents/poisons-act-1952-and-regulations.html>

2. Sila pastikan label pembungkusan ubat adalah lengkap dan ubat dibawa dalam bungkusan asal agar dapat dikenal pasti dengan mudah.
3. Ubat yang dibawa masuk ke Malaysia mestilah untuk kegunaan diri sendiri atau ahli keluarga yang tiba bersama.
4. Bagi anda yang melawat atau tinggal di Malaysia melebihi dari satu (1) bulan dan memerlukan bekalan ubat yang berterusan, anda dinasihatkan untuk berjumpa dengan pengamal perubatan berdaftar/ doktor di Malaysia untuk mendapatkan preskripsi dan bekalan ubat.
5. Pelancong dinasihatkan agar mendapatkan maklumat berkaitan prosedur pengimportan sebelum ketibaan di Malaysia.
6. Sebarang pertanyaan lanjut, boleh diajukan melalui email [pelesenanbpf@moh.gov.my](mailto:pelesenanbpf@moh.gov.my) atau hubungi talian +603-7841 3200/ 3320.